

Votacion lo indica

Awe lo haya sa si ta haya presidente di parlamento nobo

Ya tur cos ta cla pa cera e aña Parlamentario, cual lo tuma luga dialuna, dia 7 di September y e apertura su dia siguiente. Segun presidente di Parlamento, Marisol Lopez-Tromp,

“Trabounan ta bayendo den full swing desde di e incidente cu a tuma luga dia 27 di Augustus. Unda cu e edificio di parlamento keda totalmente destrui mas cu 60 bentana cu porta a keda kibra. Hopi hende por pasa wak hende verf pero e trabou principal ta paden. Pa siguridad di tur hende, di e empleadonan, di e bishitantenan.

Mester adapta e sala di reunion pa por tene reunion bek, el a sigui splica. Pues tur esey ta andando. Internamente tambe ta preparando pa e reunion publico di e ceramento di aña parlamentario, cual lo ta dialuna y pa eligi of reeligi e presidente di parlamento. Diamars ta e apertura di aña parlamentario, cual tambe ta un reunion publico, di cual ta full prepara pa e esaki, Sra. Lopez – Tromp a bisa.

Vota

E votacion lo determina, cual lo ta dialuna, 7 di September lo determina si Sra. Lopez – Tromp lo keda presidente di parlamento. “Esey ta un procedura cu ta tuma luga tur aña. Semper rond di e fecha ey ta tende yen di speculation, pero na final ta e miembronan di parlamento mes ta dicidi ken ta bira presidente of keda nan presidente.” Ta trahando riba diferente



cambio paden no solamente fisico, pero otro cambionan pa mehora e instituto parlamento di Aruba, el a agrega. “Loke a pasa recientemente cu e organo mas halto di nos pais a wordo destrui di tal forma cu hasta e parti paden mester a wordo evacua, esey ta duna un señal cu na e momentonan aki cu pa nos, el a pone nos pensa y evalua no solamente riba proteccion di e empleadonan, pero tambe con leu hendenan tabata dispuesto pa bay y hasta pa kibra y destrosa nan mesun cas. Esaki no ta di mi e ta di nos.”

Importante presencia parlamentario

A puntra Sra. Lopez Tromp tocante di e situacion cu Mep

ta evaluando si nan ta bay participa na aña parlamentario nobo mirando e cuestion di ley cu a pasa y nan disgusto, anto si esaki por pasa cu nan

por keda sin presenta. Sra. Lopez-Tromp a splica: “Cada miembro di Parlamento ta wordo eligi pa pueblo pa asumi su responsabilidad akiden.

En realidad no ta existi fraccion. Legalmente ta existi cada miembro di parlamento representando Aruba akiden. Awor por tin hopi ley a pasa cu si of no ta contento cun’e. Pero no lubida cu apertura di un aña parlamentario ta nos ta invita bishitantenan, caminda cu gobernador tambe lo duna su discurso, cual ta conoci y tin invitadonan tambe cu ta bin na e organonan, cu ta instancianan cu semper a traha den parlamento y cu den bida diario ta haci trabao hunto cu parlamento.

Ta mescos si mañan tin algo na bo cas y abo como doño no t’ey pa ricibi e invitadonan, cual bo ta representando. Cu esaki mi kier bisa cada parlamentario ta dicidi esaki pa su mes, pero ta importante pa subraya cu parlamento ta e simbolo di democracia pa nos pais y e hecho cu ta para eyden ta bisa algo,” el a termina bisando. □

